



Rekorda konferenco de ILEI

La solena malfermo de la 45a Konferenco de ILEI (la Internacia Ligo de Esperantistaj Instruistoj) estis sendube la plej impona en la liga historio, kun la plej altrangaj akceptantoj iam ajn altiritaj. Podie sidis naŭ solenuloj, ses personoj alparolis la 300-kapan publikon. Eĉ kun dulingva prezentado, la ceremonio restis ĝis unuminuta precizeco ene de la antaŭvidita horo. La unua preleganto estis la antaŭa vic-estro de la provinco Junnano, s-ro Liang Gongqing, kiu jene priskribis la provincon: ‘Ĉi tie estas okulfrapaj belaj artoj de diversaj nacioj, buntaj popolaj bildoj de diversaj nacimalplimultoj, kun briloj de longa historia kulturo.’ Ĉeestis plie la nuna provinca vicestro.

Responde, la Prezidanto de ILEI, Stefan MacGill, dankis al s-ro Liang pro la bonvenigo kaj provinca apogo por la konferenco. Danko direktiĝis al s-ro Duan Yongxing, longtempa esperantisto kaj Prezidanto de la gastiganta Profesia Artkolegio de Kunmingo, pro la materia kaj arta helpo de la kolegio. Li plie skizis la historion de ILEI-konferencoj – ĝis 2006 obstine eŭropaj kun nur tri esceptoj. Ekde 2007 okazis tutmondiga eksplodo, kulminanta en la Kunminga konferenco. La saluto venis al fino per observoj pri la konferenca temo.

La tria parolanto estis la prezidanto de la kolegio, kiu parolis en Esperanto kaj ricevis ĉinan tradukon. Li diris interalie: ‘Lingvo, kiel ilo de amasa komunikado, karakteriziĝas ofte per kunfandiĝo de pensoj kaj karamboj de saĝofajreroj. Esperanto, kiel ponto inter lingvoj, dissemas ideojn de espero, paco, amikeco kaj amo.’

Nome de LKK parolis s-ino Gong Xiaofeng (Arko – dekstre sur la foto), kun bonvenigo al la partoprenantoj el 19 landoj. La landajn salutojn prezentis Bharat Kumar el Nepalo, reprezentante la aziajn sekciojn, kaj Aurora Bute el Rumanio, nome de la ne-aziaj.

Antaŭ la malfermo, en akcepto por la alvenantaj ĉinaj gastoj, ni tuŝis la deziron de la provinco kaj kolegio vastigi siajn artajn kontaktojn pere de Esperanto al landoj, kie tiuj ĝis nun ne ekzistas. Tio inkluzivus reciprokajn studvizitojn aŭ liveron de art-instruistoj.

Klare ĉi tie ekzistas malferma sinteno al Esperanto kaj de ĝiaj praktikaj ebloj.



Sekvis spir-haltige mirinda arta koncerto kun eroj el plej diversaj regionoj de Ĉinio. Aprezema publiko ĉeestis; plie al ĉ. cent konferencanoj, aldoniĝis ducento da studentoj kaj instruistoj el la kolegio, por pleni la halon. Legu impres-fragmentojn de kelkaj konferencaninoj:

“Mi spektis la bonvenigan artan prezentadon kun granda plezuro; speciale la drako-danco (vidu la bildon) farita de gestudentoj de la artkolegio kortuŝis min.”



Han Sug Heui, el Koreio.

“La Bonvenigan Prezentadon mi ege ĝuis. Mirinda fakto estas, ke la prezentantoj de kantoj kaj dancoj en belaj tradiciaj kostumoj estis ĉefe studentoj. La nivelo de la prezentaĵoj estis tre alta. Mi ĝuis la bildojn de tipaj pejzaĝoj de la provinco Junnano montritajn surekrane.”

Tieko Išikawa, el Japanio

“Se ili estas ankoraŭ studentoj, mi ne klare vidas, kion ili ankoraŭ bezonas lerni. Preskaŭ ĉiu el la eroj povus prezentiĝi en prestiĝa londona teatro kaj homoj volonte pagus por vidi ilin, kaj poste ilin rekomendus al siaj konatuloj. Ne nur la artistoj estis elstaraj kaj allogaj, la vestaĵoj, kaj entute la prezento estis ege profesia. Eĉ post mia eliro, mi ankoraŭ restis forte emociita pro la beleco kaj talento kiujn mi ĵus ĝuis.

Ana Montesinos, el Britio

“Duhora programo estis mirinde zorgeme, lerte farita. Ĝi sukcesis prezenti tradiciajn trajtojn de multaj etnoj, kiuj vivas en Junnano. Kiam aperis kvar viroj al podio (vidu la bildon), la sento estis, ke alvenis saluto tamen iel modernigita el tre foraj tempoj pri la montara vivo. Impona estis mongola instruisto, kies prezento montis konstantan bezonon rigardi ĉu alvenos batalontoj; oni devus montri aŭ ŝajnigi sian fortecon kaj potencon.”



Synnove Mynttinen, el Finnlando

“Nepalo estas lando de diverseco. Loĝas cent etnaj grupoj. Multaj etnaj grupoj havas similajn dancmanierojn kaj vestaĵojn. Do, mi sentis min hejme dum la prezentado.”

Indu Devi Thapaliya el Nepalo

La konferenco altiris 113 aliĝintojn, kun 104 surlokaj partoprenintoj. Do, temis grandmezure pri la plej granda ekstereŭropa ILEI-konferenco iam ajn, kaj la plej granda entute de la lastaj 26 jaroj (ekde kiam ni havas informojn). La komitato akceptis du novajn honorajn membrojn, s-rojn Li Shijun (Laulum) kaj Li Weilun (plej dekstre sur la suba foto), kiu prelegis kaj kursgvidis dum la konferenco.



La komitato akceptis plie tri novajn aziajn sekciojn en Mongolio, Nepalo kaj Vjetnamio. La nova estraro de ILEI por la sekvaj tri jaroj rompis plurajn rekordojn. Rekorde granda (9 membroj pro la laboro-kresko), rekorde ina (5 el 9), rekorde renovigita (6 novuloj) kaj rekorde tutmonda (4 el 5 kontinentoj).

Fariĝis tradicio, ke ILEI kadre de sia konferenco starigu dialogon kun ne-esperantistaj universitatoj spertaj pri lingvoj kaj kulturoj. Tio realiĝis en tuttaga simpozio kun deko da prezentantoj, ĉiu prilumanta iun aspekton de la kongresa temo: ‘La arto de komunikado, komunikado de artoj’. La temo aparte aktualas en la provinco Junnano, kiu entenas loĝantojn kun ĉ. 25 etnaj grupoj, la plimulto kun apartaj lingvoj, alfabetoj, kutimoj kaj artformoj. Grandas la bezono por komunikado inter tiuj malplimultoj.

La prelegoj okazis en la ĉina kaj Esperanto. Tradukoj estis montritaj ekrane por rapidigi progreson kaj permesi seninterrompan paroladon. Diskuto-tempo restis post ĉiu prelego. La 150-seĝa aŭditorio estis plena. La programo disvolviĝis jene:

Prof. LIU Xuxiang, Universitato de Yunnan, Instituto de Supera Edukado:
“Edukado en transkultura komunikado” (Ĉinlingve)

Penny VOS, Jennifer BISHOP, ILEI, Aŭstralio:
“Invito al la Tuta Vasta Mondo” – nova projekto kaj instruplano (en Esperanto)

XU Shaohua, vicprofesoro de Teknologia Universitato de Kunming,
“Konfrontiĝi al problemo: studo de kulturaj diferencoj en la transkultura komunikado
inter Ĉinio kaj la Okcidento” (Ĉinlingve)

Ronald J. GLOSSOP, ILEI, Usono:
“Kiel artistoj povas antaŭenigi pacan mondon” (en Esperanto)

S-ro YUAN Hongyu, prezidanto de Yuunan-a Esperanto-Asocio,
“Yunnan bezonas Esperanton” (Ĉinlingve)

Mireille GROSJEAN, ILEI, Svislando,
“Klasointerŝanĝoj: konatiĝstrategio kun lingva, socia kaj kultura aspektoj” (en Esperanto)

S-ro ZHOU Hong, docento, PhD kandidato, Universitato de Yunnan,
“La akordo de la animo kaj artoj” (Ĉinlingve)

DU Shengyan kaj LI Mei, magistras kandidatoj,
“Lingvo kaj personeco” (Ĉinlingve)

S-rino XIE Min, docento, La profesia artkolegio de Kunming,
“Scioj – Konsento – Rekono: Artaj Valoroj en la Transkultura Komunikado” (Ĉinlingve)

Alan BISHOP, Monash University, Victoria, Australio, “La edukado pri valoroj en
matematikaj kaj sciencaj klasĉambroj” (en Esperanto)

La prelego de s-ro YUAN Hongyu, kun mapoj kaj bildoj, estas akirebla en la retejo de
ILEI, www.ilei.info, ĉe la enira paĝo, sub ‘Novaĵoj. Ĝi donas valoran superrigardon pri la
kultura, lingva kaj etna bunteco de la gastiganta provinco.

Sur la foto la prezidanto de la kolegio, s-ro Duan Yongxing vespere tostas kun
postdiplomaj studentoj de la Universitato de Junnano, kiuj kontribuis al la Simpozio.



Lastatage okazis sukcesa Lingva Festivalo, en kiu estis prezentitaj 18 lingvoj, kio altiris ankaŭ studentojn el la kolegio. La impona ferma ceremonio ĵhus okazinta prezentis ĉefe kantajn kaj dancajn erojn.



Ĝi finiĝis per 25-kapa koruso, kiu kantis la himnon laŭ vigla interpreto; tio estis la komencpunkto por konferencfina koncerto. Ties finon markis adiaŭaj kantoj en Esperanto, dum kiu videblis fone sur giganta ekrano centoj da profesinivele faritaj fotoj el nia konferenca semajno – bela memorigo pri la neforgeseblaj tagoj kune pasigitaj. Kronis la vesperon piroteknikaĵa spektaklo tuj ekster la koncertejo.

Stefan MacGill, ILEI.

Rezolucio de la ILEI konferenco en Kunmingo

La 45a Konferenco de ILEI, okazinta inter la 20a kaj 26a de julio 2012 en Kunmingo, Ĉinio, kun 113 aliĝintoj el 19 landoj:

- Deklaras sian entuziasman apogon al la nune diskutata Strategia Vizio de UEA; la Ligo kunlaboros en ĝia kompletigo en la formo de Strategia Plano.
- Apogas la vizian reliefigon de demokrata decidado en la Asocio, la klara elstarigo de ĉefaj agadkampoj kaj de la aktivigo de membroj kaj la landaj kaj fake asocioj.
- Subtenas la eneston de la grava principo de lingva justeco, kaj proponas enkadrigi ĝin en la ideon de tutmonda solidara socio.
- Bonvenigas aparte la specifecon de la vizio, kiu antaŭvidas konkretajn subcelojn, kiuj estu realigeblaj, mezureblaj kaj ambiciaj.
- Kaj laŭdas forte la planojn dediĉi pli el la asociaj rimedoj al progreso en la kernaj agadkampoj, inter kiuj klare troviĝas la edukado kaj instruado.